

求是堂詩集

求是堂詩集卷七

結秀集

涇縣 胡承珙

將至南康東鄭夢白

祖琛

明府同年

籃輿三日夢惺忪四月驕陽匝地紅蒼翠愛看天子障清涼  
思得故人風晴途雲霧生衣上夜渚星辰落鏡中私署頭  
銜君莫怪江州提舉太平宮

星子訪鄭明府不遇晤其尊人柳門丈留宿且爲辦廬山之游

赤日曛曛逐客走一笑廬山落吾手見山如見故人面自愧  
塵容已五斗故人一別黃金臺琴聲遙落宮亭隈西江

道院致瀟灑卧看九疊屏風開雲中五老招我宿告我河  
陽花滿目餅大如槃繭如甕使君只辦餐湖淥我來不見  
雙飛鳧忽聞老鳳鳴高梧酌我以下若之春酒飲我以渚  
山之苦茶開牕指我竒峰九十九烟霏嵐靄朝昏俱怪道  
新詩古貌皆敷腹

先生出示聽  
兩樓詩稿

平生空好游五嶽未登一

匡君有約已五年翠壑丹崖如皎日

壬戌舟過九江欲  
爲廬山游不果

便

欲絕頂陵華蓋拗取芙蓉擲天外更乞仙人九節杖持向  
先生設再拜先生採藥策白鹿我去還騎黃鶴背五月梅  
花江水流重攜蠟屐汎扁舟故人歸來倘相念已在江干  
縹緲之飛樓

出南康郭門往廬山道中

出郭少塵事灑然遺我形浮雲一以披了了見翠屏風踈  
林壑秀日暖花草馨溪回眩屢顧嶺複疑重經湖光明樹  
杪迴若浮滄溟白鳥忽飛翻掩映山光青安能繫雙足馳  
書報山靈華芝倘可采爲我開巖扃

小三峽

坡陀如連鼇石梁跨鼇背束迫成一溪雷霆走其內度澗  
流稍平清光炯破碎石壁森兩崖倒景浸深黛時見五色  
魚空明游不礙秀潤發山容草木亦晻夔遙知棲賢竒絕  
叫驚眩憤此其小小耳俯仰有餘態拳裳欲涉之碧藻互

縈帶何當屑雲母於此置水碓

白鹿書院晤馬元伯

瑞辰

吉士同年話舊有感

逢君絳帳談經處值我青山著屐時  
乍轉松陰聞誦讀偕行流水見鬚眉  
穩穩怕對羊公舞落拓羞爲狗監知  
雅有故人同此意那令游子不相思

獨對亭次王文成公韻

探幽無近尋選眩宜卓見茲亭領佳要  
蒼翠納諸巘橫嶺側者峯一一識眞面  
可笑五老人蒼顏亘不變自從有亭來  
閱人如郵傳而愁塵外蹤求懷邱中眷  
陶公有高致獨酌不須勸悠然且南山忘言復何辨

五老峯歌

深山鶴語堯年冷甲子茫茫人不省只有蒼顏五老人曾  
把芙蓉撫丹頂流星明明飛上天琅霄浴罷銀河懸忽隨  
瀉地化爲石至今不死三千年山中烟雲足供養瑤草芝  
田日應長叱鸞作馭龍耕烟百尺青松截爲杖偶然遊戲  
排華顛雲裾風馬皆聯翩醉來欲倚香爐眠下視人世何  
紛然大兒陶靖節小兒李青蓮已自不記雲笈嬪何處知  
有周顛仙竭來竟踏層崖巔左挹浮邱袂右拍洪崖肩拔  
地倚雙劍入林招七賢更呼泰山青城與之相周旋天風  
飄落笑語響恍惚聞說羲皇前白雲渡海如鋪綿長江一

線流蒼烟掌中牛斗分星躔吳楚微茫芳草邊但見東南  
半壁天光水色一碧如環連人生動欲圖不朽倏忽白衣  
變蒼狗誰能似此五老人便與頑空共長久樂天作達徒  
區區遺集東林竟何有眼前有景留不得豈暇浮名計身  
後安得澄湖變春酒倒插雙瓢卣五老五老許我否  
盡吸西江爲爾壽

詠龍爪松

蕨芽小兒拳茶片仙人掌春霆忽挾蒼龍飛遺蛻雖枯迴  
下丈昨宵風雨崩危石劈處猶遺巨靈迹拏雲心事人不  
知偃蹇空山徒自惜

香爐峰歌

一峰出雲一峰雨一峰一峰相吞吐未若香爐亭亭架碧  
空游氣初生纔一縷一縷纔青一縷白裊裊雙烟勢撐拄  
須臾籠罩成氤氳青鸞翱翔白鶴舞誰將漢殿銅博山紫  
翠千年出深土我有水沉香少許到此爲君爇一炷靜對  
踈簾日移午

白鶴觀

萬里岷峨一謫仙碁聲旛影悟詩詮青牛老子知何處白  
鶴新居又幾年徧覓古松悲浩劫偶尋芳草識流泉黃冠  
零落丹房冷依舊閉門清晝眠

王楊坂田家小憩

犖确山徑微腰脚瘁登頓及此忽平曠如罽開九畹微風  
生縠紋秧碧不盈寸山色環四圍青天豁人悶人家住深  
谷風俗自樸愿仲夏方暄妍幽花未全褪門前陰桑麻屋  
角長藤蔓清泉煮茗供客頗繼綵愧彼白鷗閒羨此黃  
犢健恍惚桃花源胡麻倘可飯

棲賢谷三峽澗

谷口松杉陰清涼解煩暘行行度危橋忽聞巨響發俯瞰  
目頭眴久立足窳脆絕壁削萬仞對峙迴雙闕深幽閉元  
陰巉峭露堅骨午日無留照飛雲倒影沒一墮不知底駭

此蒼蘚滑循崖試跼步奔流益蓬勃千軍恣騰蹂萬馬競  
觸突鼓角鳴地中雷霆破龍窟磊磊澗中石不受水齧斲  
羣起當水衝不爲凹爲凸水却穿其脇迸散更飄忽百阻  
成一瀉餘怒墜石髮我聞蜀道難空舫又明月天光纔一  
線舟楫迫倉卒即此百步間怪事殊咄咄違山已十里神  
志猶恍惚

玉淵潭

層崖忽宏敞上有千人座雲屋構百間無此磐石大清泉  
會衆壑泠泠石上過水忽不貼石懸流猛顛簸瀉恐天漢  
傾衝愁地軸破在山泉水清亦復多折挫百尺如欲飛千

聲祇自作去聲直下滙一潭定有神物卧腥風透草木凜凜

不敢唾時方困炎旱塵塊揚坳堞我欲驅雷公一鞭蟄龍  
情霖雨澤四方朝野相與賀作詩不能神聊用洗寒餓

棲賢寺觀許從龍所畫五百羅漢圖

已近諸天雨猶聞萬壑雷靈圖愁化去怪石欲飛來但著  
登山屐何須渡海杯落迦無住處卽此是蓬萊

採石耳謠

採石耳石耳乃在五老峰之東積鐵萬仞瞰無極徑路已  
絕風雲通猿猱不至人透空繩掛將崩石手攀欲折  
不折松銀瓶落井無消息新鬼偃偃舊鬼哭深山草木聞

血腥半夜鬼燈閃幽碧鳴呼螻蟻知畏死利之所在竟如  
此君不見豸龍可屠虎可縛轉瞬螳螂飽黃雀季子不恤  
轅車轅主父齊甘死鼎鑊捕蛇作脂常被吞探驪得珠險  
遭攫今古茫茫一邱貉山僧細煮供晚餐舉箸無聲淚潛  
落

萬杉寺訪余處士不遇

處士建昌人年五十餘絕意  
婚宦學辟穀法旬餘不飲不

食卧輒數日不起寓居廬山萬杉寺蓋靜者流  
也其族子某白鹿書院肄業生爲余述之如此

名山自與人世通支許由來成絕迹雲堂殘月煮孤燈大

半山僧多菜色

宋張紫微題萬杉寺壁詩有  
今日山僧無飯喫句見程史

何來塵中人

乃是餐霞客不須香稻吹紅蓮只辦荆薪煮白石我來問

訊商山芝松花滿地鶴歸遲明朝有約攜拄杖鐵舡峰頭  
看奕碁

山行大風

風穴何時失扁鑰土囊一洩山石落客行十步九逡巡深  
林淅淅如有人吹沙作雲勢忽勁五嶽動搖立不定老臬  
踏樹作人蹲猛虎一聲巖谷應陡將一片笠吹掛松樹枝  
仰面飛泉灑人冷瀑布多於千鷲鸞

開先瀑布

石壁陰森壓僧舍五月清寒不知夏老龍怒挾雷電飛倒  
捲鄱湖向山瀉崩摧拉雜龍工家迸折玉柱翻冰車鮫綃

萬丈惜不得石飛海立愁咨嗟罡風一掣忽中斷白雲片  
片隨風斜日照香爐現五色雙烟一氣噴紫霞濤頭怒春  
石倒縮窪作澄潭滙幽綠老龍歸去湖水乾依舊仍來潭  
底伏臨流不敢濯雙足恐致龍驚雹如屋

敬觀

聖祖御書賜秀峰寺額金字心經冊江淹從建平王登香  
爐峰詩石刻

梵宇開金笈

奎章麗紫霄虛堂龍象護陰壑鬼神朝彩筆清詩重羣峰  
秀色標江南四百寺異數豈頻邀

宿開先寺夜雨晨起復觀瀑布

青燈對古佛萬慮無纖豪空山夜來雨松竹皆蕭騷夢醒  
忽震撼怪此匡牀半泉聲吼屋脊如伐萬鼓磬天公似有  
意挹海添波濤又疑雙劍尖割天流其膏快意急先覩  
處逢爬搔樹杪見白練始識從來高一落千丈強焉得不  
滔滔殷崖慄虎豹瀉壑哀猿猱曉夢不可尋魂魄驚潛逃

戲題聰明泉

竭井嗜其甘焚蘭爲其馥鑿竅混沌死制書鬼神哭賦狙  
適自弄畫蛇祇取辱五技鼯尚窮一心蚘斯足聰明亦何  
爲早慧諒非福山泉取諸蒙誰爲冒此目徒令駭者疑縱

飲思滿腹貪泉不易性狂井漫從俗一往皆天游吾懷愚  
公谷

李中主讀書臺

春風零落麝囊花駐節亭荒日又斜只有寶陀巖畔石年  
年長自鎖烟霞

駐節亭寶陀巖皆在棲賢並南唐元宗游憩之地石上有御駕到此四字隱隱可辨

文采風流付嗣王重瞳贏得淚承眶讀書萬卷猶今日爭  
恠湘東一目亡

讀王文成公磨厓紀功碑

皇輿方奠定主志漸淫昏穆滿游無厭劉安坐自尊陰謀  
憑場竈狡志覬踰垣遂擅依山鑄真思問鼎存奸紳羣傳

翼苑士屢沾恩削衛旋開覺交章早結怨一朝成潰決千  
里若崩奔城郭風都靡江湖勢可吞中丞移節鉞大義屬  
橐鞬慷慨登壇誓從容料敵論急須搜兔窟頓使觸羝藩  
已搯籠中吮先游釜底魂官亭屯似蟻樵舍縛如豚始信  
金甌固空憐玉几溫公方馳凱奏帝忽御戎軒威武南巡  
曲憂危北寺寃罪疑悲馬援黨禍鑑陳蕃白璧甯留玷青  
蠅自止樊窮山思縱虎舉國恐亡猿兒戲成何事臣功本  
不言團蒲從宴坐大樹且孤蹲赤手崇朝辦丹心靜夜捫  
易摧吳淠甲難返伍參轅補牘書羣小歸俘息衆喧回天  
終有力捧日更誰授遂勒燕然石長留敷淺原雙丸同照

耀萬古此嵯岷鳥鼠猶疑畏龍蛇競欲窺真儒須事業絕  
學況淵源嘉靖惟邦國尊行本聖門遺祠常俎豆過客自  
蘋蘩願共浯溪石囊箋拓百翻

客有談天池聖燈者作此示之

我昔扁舟彭蠡湖雪花片片驚毛羸舟膠浦凍萬籟無舟  
子夜半驚喧呼湖心一燈乍見初一燈一燈花連附頃刻  
白晝驚鷗鳧琉璃世界開冰壺江妃回駕馮夷趨金支翠  
旗紛前驅閃爍蝸蝓奔天吳舟子再拜彎其軀非仙非鬼  
難究圖我謂幽宮寶所儲發揮光怪聊須臾是時驪龍方  
吐珠照耀七尺紅珊瑚金生沙汭皆敷腴玉出碕岸潤不

枯即看燈火明坳嵎深山大澤無差殊儒生眼孔豆不如  
其所不見輒謂虛履武吞卵皆厚誣可笑歐九不讀書陰  
陽造化有筦樞根源究竟皆糲糊日輪月御誰轉輪青天  
碾徧東西隅雷風水火搏控俱習焉不察真凡愚一燈之  
出猶區區狂言快發胸膈舒一客擣舌頻弄鬚一客張目  
徒睢盱

黃巖道中

蒼厓無階梯天風扶我上白雲忽飛來咫尺墮渺莽千山  
與雲浮從風欲動蕩朶朶金芙蓉亂插白玉盞地虛未敢  
踏天逼不可仰舉踵歷後頂出手昧前掌漸覺衣裳濕微

聞笑語響偶遂陵雲游因懷出世想身披翠霞帔手執綠  
玉杖八極從翱翔三山恣來往一曲游仙詞平生屐幾兩  
文殊塔觀瀑布

鶴鳴龜背間劔脊爐峰裏掛此兩白龍開先僅其尾我欲  
窮真源高高不知幾竦身與峰齊所見益奇偉疊嶂鏡青  
冥元氣洩不止高雲入輒化古雪流無始乃知滔滔中雪  
魄雲爲髓自此至開先誰能計以里崑崙疑有源渤澥恐  
無底試作建瓴觀知費若干水銀河落九天首自箕斗起  
何必更乘槎此間倘已是黃姑與織女翩翩者誰子聊攜  
片石歸君平定知爾

三疊泉

巨瀑如枯松往往爲直幹天公偏好奇故欲翻成案濯錦  
天孫機剪裁爲數段蜿蜒來上層玉虹掛天半裊裊與雲  
浮亭亭逐風斷萬斛牟尼珠一一冰絲貫盤空橫巨鼇觸  
之忽迸散樓高雪成毬臺迴銀作彈百步濺人衣回光倏  
陵亂跳空勢不衰屢折氣益悍直下趨龍潭洪流信浩泔  
俄貪偃師戲旋駭昆陽戰坐久思貂裘赫暑不能汗初入  
玉川門清泉已渺漫參差走亂石潏洄循曲岸巴水與之  
江無此好波瀾良由折疊餘水流成習慣百鍊繞指柔本  
性幾改換逝矣聖者懷雄哉達人觀到海應獨紆登山此

爲冠

歸宗寺

微生多難欲逃禪

施愚山初至歸宗寺詩云一生多難愛逃禪

蓮社閒來結淨

緣自信黠癡分半體聊思哀樂道中年法華妙處金輪轉

身世空時石鏡圓誓墓何須爲懷祖只應情性慣林泉

石鏡俱峰名在歸宗寺後

玉簾泉

古洞春深瑤草熟鏤玉成絲織寒綠曉雲漠漠張素空片  
瓊碎夏聲丁冬銀灣晝隔紅塵斷洞天福地無人管青鸞  
縛尾掃落花燕子歸來簾不捲

簡寂觀次韋應物韻

溪喧境益靜，雲暗山更深。  
踏蘚翠粘履，捫蘿綠滿襟。  
偶拾白鶴羽，因憩青松林。  
陶公固高節，陸子亦素心。  
濁醪有對酌，清景無獨尋。  
寥寥千載下，誰爲此嗣音。

李騰空

金釵鈿盒出深宮，錦褥香銷恨未窮。  
一吸丹霞容不老，只應長侍李騰空。

洗淨鉛華絕世情，琴心三疊道初成。  
可憐赫赫蕭京兆，枉向權門誤一生。

蔡尋真

神仙通鑑以爲蔡侍郎女

弄壘宰相不知羞已惹仙山一段愁莫也侍郎同伏獵總  
輪兒女占清修

露滴松枝拂醮壇月明風細玉笙寒詠真  
洞名相傳蔡與李騰空講道之  
所會罷游何處丹龜塵封付鶴看

曉起望湖中落星石

清曉湖光勝潑汞一帆插湖久不動諦觀鏡面浮圓螺林  
嵐蒼蒼石龍從山頭昨夜天光背只恐警欬聞天廷驚迸  
星辰大如豆落地高於百尋獸

白鹿洞

枕石石常冷撥雲雲不開月明芝草熟應有鹿歸來

釣臺石

潭影動空碧釣竿何嫋嫋  
低頭玩游魚舉頭送飛鳥

雙劍峰

崆峒倚天劍割雲人不知  
前山風雨夜看取化龍時

姊妹石

山花簪寶髻石鏡照羅衣  
莫向高唐去行雲竟不歸

七賢峰

竹林生清風顏公詠其五  
散髮入深山山王倘可數

鶴鳴峰

一鶴戛青冥幽人自在聽  
可憐陸參佐臨死憶華亭

犀牛峰

垂胡疑喘月解角定通天清曉無人見還來飲澗泉

漱玉亭

焚香坐終日靜撫春風琴譜入水仙操人間無此音

招隱橋

芳樹籠晚烟冷冷暗泉響獨坐生隱心前峰月初上

栗里

花落鏡潭上鶯囀楊柳邊空山無甲子長似義熙前

醉石澗

不折督郵腰肯吐丞相茵我眠君且去陶陶率天真

雲霧茶

摘石和清露燒鐺煮冷雲枯腸澆七椀咳唾亦氤氳

娑羅樹

貝多森寶樹云是達摩栽葉待翻經寫花留覆鉢開

留別廬山

游廬山數日周山之南得其大概其陰乃在尋陽  
俗事學如未暇往也然而東西林寺大小漢陽峰  
雖不能至心嚮往之矣將子毋死尚其能來白雲  
在天吾言不食臨別戀戀情見乎詞

平生五嶽游發軔自茲壑目送孤雲還身隨一鳥落是時

仲夏交谿谷錦繡幕萬朶芙蓉花青天吐苞萼吳楚蒼茫  
中到眼殊廓廓巉壁開梯枕幽扃啟關鑰遙景往輒迎近  
賞來更躍耽寂神自融探奇魂屢愕未知混沌初誰爲巧  
鏡鑿緬懷三代時封鎮九州各五嶽逮秦漢三公等秩爵  
衡山僻南裔曾不岱華若卑卑培塿耳何至數瀟霍祖龍  
固愚人劉郎亦大錯茲山鄣東南祀典允宜恪所以歷禋  
來仙靈此棲泊尤多振奇人鴻篇遞照灼安得訴真宰移  
封資嵯嶸欲呼雲中君愧乏霞上作此來偶然耳只辦一  
芒屨其陽已選勝其陰未領略豈不懷雲松奈此人事縛  
憬如別親友胸中有餘惡終當畢婚嫁淨洗塵土脚潭上

鞭蒼龍雲間跨白鶴石髓叩元關金丹合大藥徧歷千峰  
頭所至自斟酌細讀青苔篇摩挲紫雲鏐聽唱升天行乃  
知出世樂書此謝山靈籍在毋我削駕非俗士迴門甯生  
客却未敢誇前緣聊以堅後約

贈夢白明府即以留別

銅章墨綬一番新來與匡廬作主人盡取烟霞供嘯傲首  
栽桃李見經綸

君留意白鹿書院與馬元伯山長相得其權

可憐賈誼眞年少

難得陶潛是部民福地洞天三十六

道書以廬山爲三十六洞天

拳帷

何處不清眞

讀徧牙籤小試才稻苗被隴雉無媒庭餘芳草官多暇邑

有名山客慣來我意已如飛鳥倦君歌莫效竹枝哀師門

回首俱親切何日談經許共陪

乙丑會試君與予同出吳見樓先生本房

游廬山後見者輒問奇勝倦於酬應聊作長句答之

萬里岷江猛奔注欲帶羣山盡東去匡廬乃自祝融迴鴈  
之峰來萬馬崩騰逼江住遂鎮吳楚障東南九派安流殺  
狂鷲里周三百丈七分野中分斗牛度一重出雲一重  
霧一重稍偏雲不駐尚有重重不知數自到山中目未閒  
不覺三朝又三暮崎嶇澗谷宜幽尋變幻烟嵐失回顧千  
峯拔地不讓人一線通天又成路舉杖敲星鏗有聲轉石  
成雷落何處山形百態難具論嶧蜀堂盛岑嶠巖壯士切

雲冠嵯峨老僧偏祖坐箕踞徐娘時作半面粧湘妃方試  
陵波步熊羆貔虎爭攫拏鷺鷥鴝鷖互騫翥王母欲下羣  
龍翔海神歸來百靈赴旛幢羽蓋羅天廷戈矛劍戟森武  
庫亭亭出水芙蓉花鬱鬱干霄豫章樹峯非礙日應更高  
石未崩雲便能怒老木無枝不成癭懸巖有水皆如布自  
是知者所設施愚人那得知其故胸中邱壑偶然耳到此  
何期與目遇看山端合在山中請君莫爲坡公誤

鈔廬山詩畢戲題一絕

宋晁叔用詩云不到西湖看山色定應未可作詩  
人朱韋齋詩云不向九江看五老故應猶未是詩

人余春初在杭州仲夏來匡山百二十日聞耳目  
所際窮極絕勝忍俊不禁間有所作徒以千里飢  
驅神摧骨折噫噫之音鬱而不暢其於山川瑰奇  
靈秀之狀未能髣髴其萬一鏤金錯采終遜康樂  
之精濺沫飛流不洗徐疑之惡故囊中貯句而壁  
上指名免付然脂聊當敝帚而已

西湖山色愛輕顰五老鬚眉更逼真十二句中都看遍肯  
拋心力作詩人

求是堂詩集卷八

家居集

涇縣 胡承珙 墨莊

戊辰立春日送玉鏤孝廉偕崇垣鏡涵諸君計偕北  
上弁東蘭坡編修

離亭楊柳未垂條薄雪霏微著地銷不奈故人從此去恰  
逢春信是今朝槐花京國三年夢燈火揚州五夜簫惆悵  
闌居成寂寞心隨歸雁一行遙

賈酒旗亭破曉寒鶯啼時節到長安如君豈合池中物若  
箇翻從壁上觀爛漫詩篇成綴錦

玉樵昨見示  
近作甚夥

團圓情話

勸加餐朱雲相見應相問爲道鮎魚嬾上竿

新年省墓

嫩晴風峭尙餘寒黏屐春泥路未乾諸澗帶冰留石底數  
峯和雪入雲端因看蓼蓼思新薦只恐松楸改舊觀兩世  
關心仍淺土浮生何日夢魂安

芝亭秀才過訪

忽驚新歲律才共故人觴問舊多零落

君尊人於去年下世

相看各

老蒼山明殘雪在風急落梅香晴昔談經處凝塵想滿床

予舊下榻君家  
曲列軒者數年

十六夜同人步至丹溪玩月石上久坐

昨來月未圓

先是十三夜  
曾於此看月

今來月將缺春宵有月能幾時

春水粼粼已生縵水中一石如月圓錯疑水底別有天我  
來問石石不言水流月照空年年人聲半雜灘聲響團藥  
踏石石如掌忽看月影波心搖知有游魚吹沫上去年今  
夕方天涯天涯見月常思家此石此水豈易得故園風景  
真堪誇月光乍散燈光簇人影出林斷復續僧寺鐘魚寂  
不聞兒童竹馬競相逐年豐預辦祝汙邪水淺不須歌獨  
漉但願年年月好來共看漱石枕流吾亦足

戲贈西泉納妾

予家蓮園  
姪房婢

輕盈團扇謝芳姿解掠雙鬟髮髻垂小阮不曾驢背負老  
奴偏有鏡臺私

徹夜鰥魚眼自開東風未嫁苦相催從教課遍兒童讀奴  
價何須倍婢來

西泉見爲蓮  
圃家童子師

夫婿年來可笑生酒酣拔劍氣縱橫只愁學會夫人樣欲  
喚蕭郎作騎兵

西泉每自詡多  
力故戲及之

半載空房一夕專曲中惟唱想夫憐生兒合作中郎將不  
枉通租作聘錢

楓坑途中懷蓮浦玉鑊北上

年年行役逐東風客路韶華到處同新水暗籠春霧綠亂  
山高吐曉雲紅梅花香細惟依樹芳草痕微不滿叢忽憶  
天涯驅馬客難將心事託歸鴻

南陵過大姊家

青絲繫馬綠楊低阿姊歡迎見轉悽百里鄉音隨地改七  
年兒女與肩齊予不到姊家七年矣藤蘿日暖花連屋鶯鴨晨喧水  
漫堤苦向樽前問身事浮萍踪跡易東西

雪夜舟中

倚枕不成眠寒生積雪邊溪流春穀水人語夜航船烏鵲  
驚啼曙星辰凍滿天七年前過客鴻爪意茫然

湖橋玩月呈館師研農少宰

湖孰門邊欲二更夜深人定板橋橫船明野火星留影江  
湧寒潮月有聲悄立恐驚鷓鴣夢催歸慙負杜鵑情蒼茫

獨詠誰相識翹首清輝悵隔城

晚泊西河

落日隱山岡長川黯將暮野曠春風寒微陰接高樹犬吠  
水邊村人歸沙上渡前舟猶未停月黑迷灘路惟聞欸乃  
聲隱隱墮烟霧半晌一燈明遙知泊舟處

馬頭磯

半日上一灘卅里天向晚篙師及估客雜選舵樓飯船頭  
月出已二更空巖竹樹皆晶瑩老魚跳波作人立滿潭搖  
動春星溼

即目

樹外青山樹裏樓，脊令鷓鴣滿汀洲。桃花不解銷春恨，楊柳偏能惹暮愁。

水西看桃花至烟雨亭久憩

天陰晝暖春蓬蓬，游絲百尺飛長空。城西流水如碧玉，浸透苔紋染新竹。竹光膩滑花光凝，青山缺處朝霞升。山半樓臺復無數，飛出紅雲罩千樹。成團蝴蝶去復還，映樹游人皆醉顏。緣坡一徑踏芳草，流水白雲成窈窕。層巒曲處繁花開，春風與客同徘徊。迎風萬朵嫣然笑，襯得修篁愈娟妙。峇峇雙塔嵌一亭，參差城郭開畫屏。亭前知費幾烟雨，釀得春光竟如許。看花愛趁花初妍，粉痕未褪胭脂鮮。

有風不顛日不多天意憐花亦憐客客散垂楊東渡頭青  
山黯黯生暮愁陰晴明日渾難料或恐飛花逐水流

秦坑田家

春風吹綠溪上山雨餘新水鳴潺潺桑枝未芽麥苗秀東  
作稍動時猶閒春晴茅屋人語靜編柴作門間斜整門外  
菜花鋪十頃烘得夕陽黃不盡

晤翥雲夜話有感

桃花開時與君過攜手紅雲最深處桃花落後又逢君水  
碧烟明悵前度花開花落如頃刻舞蝶流鶯枉憐惜只君  
把盞計良得醉顏留得桃花色相逢意氣何輪囷餅金囊

粟拘殺人丈夫潦倒過三十君坐何事成長貧自言性癖  
嗜杯酒不願平生負此口昨來果羸與螟蛉公然欲學劉  
伶婦豈知次公醒更狂孝先正復眠何妨君乎君乎依人  
作計安可常如君人物宜玉堂雖云宜玉堂不如積穀多  
蓋藏蓬萊獻賦長聲價終復饑寒趨路傍君不見百贖一  
豆悲駿馬我亦長安賃春者

坐雨遣悶

綠怨紅愁三日雨屋角春禽啣不語藥苗苦瘦苔蘚肥只  
覺輕寒戀庭宇半日敲詩遲未成濕薪裂作爆竹聲好在  
閉門無一事煮茶風味過清明

寒食日作

上已寒食連清明

三月九日乙巳次日清明古人  
禊除用上已不必定三日也

屋前屋

後皆春聲青山繚繞白雲濕一角已放朝陽晴曲池風輕  
穀紋薄昨夜早蛙鳴閣閣落盡殘紅燕不歸小庭閒殺秋  
干索

食笋

春暖平蕪接烟水燕子飛飛點沙嘴小桃幾樹飄殘紅菜  
甲花黃蕨芽紫一旬不肉厨無烟敝裘換得青銅錢驚笋  
出籬還入市買來臙臙頭齊駢閉門三日足風雨細蕪松  
明事烹煮滿眼瀟湘烟景春嫩碧嬌黃可憐汝笔以芹菹

配菽乳一味清甘出微苦不妨堅脆礪牙齒只愛槎枒拄  
臙腑江南處處春山多劘苔自欲緣層坡櫻桃未熟茶事  
早飽噉莫待春光過南風解籜將奈何食罷當筵意蕭瑟  
轉眼明年作北客寂寞空思煮牀簞

二禽言

家家插禾高田水少下田水多無田可耕饑當奈何魚則  
有網鳥則有難贖生不足徒傷天和日糴升合兒啼飯糲  
仰視屋梁不廢嘯歌家家插禾滿芳甸鄰翁田多兒莫笑  
我有牕前一泓硯

提壺盧沽美酒雨霖霖風颭颭五風十雨送春歸門外落

花一尺厚兩箱鳴絲桐中堂酌大斗清歌前緩聲妙舞小  
垂手衆賓懽娛主人壽君不見黃鶴化爲白頭見少年幾  
時成老醜今日不樂遑待後提壺盧沽美酒

西泉約集健菴

九貞

秀才齋頭看薔薇花因憶十年

前與蓮浦玉鏤諸孝廉讀書石巖山寺此花最佳

感而有作

一春閉戶坐兀兀飛紅走香去飄忽可憐花事都闌珊故  
人尚約看花出江南四月梅雨晴纖絺乍御蒲葵擎出門  
信步散腰脚仄徑清流如有情蝴蝶成毬花滿屋額眼團  
紅覆新綠斜軀金釵一萬行爛堆錦被三千幅當庭作架

陰玲瓏繁英亂插無虛空  
苔堦滴瀝露華炫粉壁照耀霞  
光烘青蛟欲走四隣遍檐隙  
靈禽翼皆絢主人讀罷客始  
來點點飛花競浮硯蒲萄春  
酒新潑醅酌花我亦傾一杯  
更思乞取花上露幽香沁入  
詩脾開酒闌却憶長安客看  
花紫陌無消息塞北江南春  
盡歸零落棲遲兩堪惜昔游  
花木深禪房別來已及十載  
強不知鏡裏青絲短祇覺兒  
時白晝長餘花晚筍依然在  
剩有吟情豪未改一更月黑  
隨螢歸夢裏花香浩如海

朱烈婦詩

烈婦胡氏子再從孫女也適朱秀才廷模  
廷模病刲股以療卒不起哀其志爲作此

詩

芙蓉斷腸紅卷施披心綠天風吹折枯桑枝深閨寡女鳴  
嗚哭可憐寡女淑且貞掌珠曾見全家孽花開不識下九  
戲絃絕能知第四聲阿爺工作相攸計爲擇乘龍好夫婿  
絳霞裁作合歡襦綠雲綰就同心髻新婦參軍剛比肩春  
花秋月度年年上頭千騎行看擁出抱雙珠本自聯從容  
佩幌綉蘭茵銜索枯魚遽難待

時烈婦身姑  
相繼並歿

風雨常愁盡

室飄冰霜却冀陽春在從此持家力不任麻衣鬢髻淚淫  
淫凌虔魚菽供朝奠軋軋鴛機助夜吟薄命迤邐那堪道  
郎病危于待霜草長卿消渴竟難瘳衛玠清羸焉得老旋  
停刀尺聲暗吞此時顧郎不顧身搜殘盡篋因求藥賣盡

珠璣爲禱神分明鬼伯相催促癡心猶望殘絲續手調糜  
粥進杯羹中有貞姬未塞肉夜深結束拜竈王喃喃私祝  
一瓣香祇緣心切禽同命恨不身如樹代僵倉皇揮刃心  
無主血染塵砧痕縷縷寡鵠毛摧暗自傷飛龍骨出誰言  
苦剝肉何能醫眼前眼看生拆鏡中鸞西山石少難填海  
北極星虧莫補天一殞邪衾長已矣古井波瀾誓不起虛  
將歲月度春風盡洗鉛華付流水痛定誰知痛更深天荒  
地老恨難任休教明月清輝照照見癡痕淚滿襟

林中曉行

疎蟬一聲萬樹碧樹罅天光不盈尺具濛殘夢飛高枝宿

鳥驚人響格磔草根未破團露光昨宵雨過秔稻香愛茲  
夜氣迫將旦欲令日馭迴扶桑六月一刻爭清涼忽驚衣  
上落山影如笠曉星壓人頂

暑行太平縣道中久憩

亂山迴合處六月少人行風勢相吞吐雲光半雨晴野花  
明蝶影密樹遞蟬聲久憩涼生腋因知靜者情

無題

水榭雲廊識面初芙蓉裙衩石華裾迎來南浦木蘭楫歸  
去西陵油壁車花氣入波知鑑近燈光穿樹想樓居啼鳥  
欲傍垂楊隱不奈秋風日夜疎

宋玉悲秋枉斷腸  
楚天雲雨盡荒唐  
屏風半面看牛女  
厯日當頭值角張  
未許桐枝巢鴛鴦  
空教塘水護鴛鴦  
蓬山咫尺無消息  
樓下清淮爾許長

半宵明月乍投懷  
剛被浮雲故故埋  
擁髻捲簾愁似水  
捧心當鏡病成顛  
瓊茅未就靈氛卜  
綈卷長親繡佛齋  
檢點藥方煩指示  
苦心蓮子豈能佳

喫虛多半爲情癡  
得見何如未見時  
住到青溪應獨處  
生成紅豆合相思  
迴腸已作車千轉  
薄鬢拚添雪一絲  
最是無聊微雨夜  
旅窗含悶對花枝

人與花俱第一  
籌分曹賭酒暗藏  
闔頻遮禁樹妨  
同座欲

訴微波託蹇脩顧我目成難入夜憐卿腰細不勝秋無端  
溝水東西處岸芷汀蘋也共愁

佻巧雄鳩恐未眞丁酉私語漫情親元霜擣盡知何日綠  
葉陰成不是春病後形容宜淺笑酒邊風味慣侔嘆憑誰  
泣訴花司命肯爲雲英惜此身

艇子時時趁晚潮幾回到此喚停橈倚闌人去香初歇掛  
壁燈昏夢亦遙小集却成長別恨中秋將近可憐宵殷勤  
一紙煩青鳥記取城西第幾橋

荷珠蕩漾不能圓離恨茫茫欲問天百計搏沙終是散三  
生證石竟何緣閒情苦被鄰娃妬悄語虛憑阿姊傳判與

玉釵敲斷絕等閑拈帶又相牽

莫愁湖

訪秋宜在水西門秋入湖山淡有痕不用更粧金粉色臉  
波眉暈已銷魂

昨來元武滿湖風斷葦殘蘆觸目空畢竟天憐粧鏡好荷  
花猶爲美人紅

艇子乘湖打槳牙傾城催送路偏賒鴟夷一舸干何事不

許游人更載花

時以秋試禁  
秦淮燈船

一片沖融窈窕間游魚不羨鷺鷥閒分明羨煞平湖水曾

見南朝絕代顏

處處魚標間鴨欄水蒨花放一叢攢鴛鴦住此頭俱白莫  
更輕拋金彈丸

樓上行雲過不行遙峰都與畫檐平叢篁碎玉夫容泣併  
作箜篌第一聲

開國中山異姓王朱門零落大功坊問他王謝堂前燕何  
似長棲玳瑁梁

輕烟澹粉久成塵無復秦淮舊日春閱過鴛鴦三十六不  
如來看畫中人

何處移將履本傳畫中人亦異當年崔徽未嫁吾曾見剛  
道無愁却惘然

堂中向懸華某白描美人一幅  
甚佳今失去重摹殊不及前矣

隱仙卷探桂花

十年夢寐叩禪關，叢桂連蜷尚許攀。  
香氣未花先釀樹，清陰如水欲沈山。  
芋爐那問三生事，茶竈聊供半日閒。  
惆悵城南無此地，幾回遲步惜苔斑。

隨園弔袁大令

枚

神仙姿格陶宏景，山水風流謝永嘉。  
一代才名通隱客，十分春色屬公家。  
雖從我法詩終健，不恤人言興自賒。  
福慧平生消受劇，繞墳猶合種梅花。

錄別

紫騮嘶向冶城南，醉倚粧臺滿目酣。  
此地果然天尺五，昨

宵剛是月初三避人私語防燈覺如我消容許鏡譜一夢  
驪宮天易曉癡雲猶自護層潭

相逢木葉脫江波小閣秋深愛屢過鄭重求詩題肯緩聰  
明教字識偏多粧成淡素年猶綺訴到飄零命似羅鷲地  
西風催棹急惱人無奈別離何

送開大雪香

時霈

入都

清淮日夕送潺湲意外相逢一水間良夜快同千里月故  
人佳似六朝山可能玉骨因詩瘦莫遣金樽對酒閒此別  
風塵前路迴星星須惜鬢毛斑

席帽襦衫憶往年舊游回首各茫然太常漫學清齋坐僕

射猶貪爛醉眠作吏風流妨走馬

君將以縣令赴吏部銓

惜春心事

託啼鵲

君舊於旅店壁間見鵲紅女史題詩屬予爲鵲紅曲

丁簾甲煎殊非惡肯爲

官程竟促鞭

### 題玉鑊看山樓

村居終歲常閉關可惜不見牆頭山  
看山愛向村前後可惜無亭置杯酒  
君家屋在山上頭尋君每造山之幽  
屋後恠石蹲猛獸屋傍古木蟠長虬  
病來一月不到此眼明忽復登斯樓  
數峰嵌壁雪皎皎叢竹戛牖風颼颼  
圖書鎮日入幽靜烟雲四面供雕鏤  
平生愛說松風閣斷手輸君先此作  
嘯歌不廢折牙齒

君新損一齒故戲及之

登臨且與散腰脚樽

中有酒固自佳，几上陳書定不惡。真人輒作天際想，達者  
須行眼前樂。憶昔與君俱少年，同攜襪被山中眠。讀罷偶  
爲鸚鵡舞，吟餘還放柘枝顛。自謂韶華宜永好，十年變幻  
那堪道。顧影思爲逐隊魚，離羣羨煞棲林鳥。君今閉戶勤  
著書，置身百尺樓中居。青山便欲成千古，黑髮何妨減一  
梳。昨告我云髮落甚多只我頻年歎行路，殘書飽死羽陵蠹。沽酒誰  
作平原留，看山又向薊門去。行李蕭條迫季冬，南飛無復  
遇征鴻。相思若爲登樓望，何處天涯風雪中。

入都留別

卧穩江南落葉村，驪歌纔唱忽銷魂。皋魚淚向三秋盡，司

馬家徒四壁存且折寒梅香客騎肯隨飢鳥傍人門明年  
春水冰開處最憶溪南釣石温

朔風初緊鴈行低漫指長安笑向西舊雨關心時問訊前  
塵如夢半難迷功名已分成雞肋歲月何堪付馬蹄剩有  
天涯吟興在郵亭閒與拂牆題

出岫閒雲任卷舒敢忘泉水在山初懷中冰雪凝前路夢  
裏烟霞繞舊廬有暇讀書皆命定無心涉世况才疎嗤他  
諫獵危詞者在費才華賦子虛

正月二日同人集家西莊齋頭

昨朝飲屠蘇漸覺遲可惱誰能却共梅花好歲月牆陰不

知老空廊曲檻生寂寥古幹繁英向晴昊吾儕歲首一事  
無嬉春欲試曲江早昏鐘已動來扣門滿室天花不會掃  
商量排日飲亡何傳席家家備蠶羹請自隗始宜今宵君  
家立辦非草草拗斷花枝當酒籌酒氣花香亂縈攪花枝  
入手鼓聲歇百罰深杯鬪清醪時席上爲  
傳花之戲蜃膏欲盡虬箭  
催一顆明星樹頭曉歸時贈花人一枝帽簷斜插風嫋嫋  
不怕襄陽羣小兒拍手攔街齊笑倒

玉蘭

吾鄉人稱白辛  
夷花爲玉蘭

東方欲動明星爛屋角銀雲凝不散素女身騎白鳳凰珮  
環搖動碎玉光廣陵瓊花上天去虬根入地不知處流傳

滴髓知有真稚蜂癡蝶空逡巡隔溪一樹開相綴迴立長  
空動烟雪油窗罩影深玲瓏忽射朝陽生眼纈暖風撲地  
春泥融烟霏片片枝頭空拾洗清泉坐石井玉骨斜封碧  
苔冷

洪烈婦詩

烈婦以  
絕粒死

食蓼不知辛食荼不知苦吁嗟乎荼蓼之食彼有取夫亡  
孑然惟一身不死長留竟奚補君不見洪錫澗妻朱氏女  
聘時八歲婚十五尊章不見依祖姑舖糜日夕弄機杼祖  
姑歿擗門戶良人病客江濟元帷一旦易素幃髻髻麻裙  
淚如雨上無親可事下無孤可撫死耳何須更回顧川夫

亡十旬無還期妾年廿三得死所白日光莽蒼青春色悽  
阻孤鸞不食金琅玕死頸長叱謝巢侶飯含何用雙明珠  
石闕銜悲永無語嗚呼孤忠絕粒能致身夫婦有道同君  
臣采薇一難斃夷叔大義由來屬婦人

文孝子詩

并序

孝子家苦負擔薪易米肉養其父數十年父死停  
柩在室鄰舍火起孝子伏棺慟火至其室自熄又  
嘗入山遇猛虎正惶遽間虎逡巡避去今年已八  
十每言及荷薪時事猶慨然有孺慕之色焉

貴爲六國相富有萬石君車馬填隘巷鼎俎羅華裯不如

居貧食力可以娛其親

解一

親棲于牀兒心皇皇盤中無肉

瓶無糧朝出采薪敝衣中野行悽惶

解二

言瞻我宇青青者

葵日之夕矣負米而歸解我菲屨著我斑衣有酒斯旨有

肉斯肥奉承而進載欣載依

解三

冬亦常負薪夏亦常負薪

自茲以往殷殷轉轉歷久而不倦者嬰兒之慕三十有二

春

解四

火乃滅矣虎不噬矣精誠之至天地徹矣

解五

兒年八

十親久逝負薪之路蔽蓬藜血痕入石不可洗嗚呼誰無

罔極恩胡爲佩玉榮兮而令其父饑欲死獨不見文孝子

解六